

## Pamahayag 3: Ang pagtuo o kawalay pagtuo sa Dios dili makaapekto kon sa unsang paagi atong gilantaw ang mga pangutana mahitungod sa kahulogan sa moralidad ug katuyoan sa kinabuhi.

Isip usa ka grupo, hisgoti ang katukma sa pamahayag 3. Basaha ang Alma 30:12–18, ug hisgoti kon sa unsang paagi ang mga tinuohan ni Korihor nakaapekto sa iyang panglantaw sa moralidad ug sa katuyoan sa kinabuhi. Dayon basaha ang mosunod nga mga pamahayag:



Ang buhat sa pagtuo nagagikan sa kasingkasing sa nakakita. Ang Manluluwas miingon niadtong naglibot Kaniya, “Busa pamati kon may dalunggan kamo” (Lucas 8:8). . . .

Tanang upat ka mga anak nga lalaki ni Lehi natawo sa parehong buotan nga mga ginikanan. Ang kalainan tali sa mga tumutuo dili kaayo mahitungod sa unsay nahitabo kanila, apan sa ilang kinaiya ngadto sa unsay nahitabo. Ang kinaiya naggikan sulod sa ilang kaugalingon nga mga kasingkasing, nga ang matag usa naghimo sa iyang kaugalingon nga gawasnon nga pagpili nga magtuo—o dili. . . .

. . . Ang [Dios] dili makakontrol kon kita boluntaryo nga mopili sa pagtuo Kaniya, sa pagdawat Kaniya, sa pagtinguha Kaniya. Siya makatanyag lamang kanato sa Iyang kamot, ug kon kita mopili sa pagkuha niini, nan Siya makagiya kanato paingon ngadto sa bisan unsa nga talagsaon natong gikinahanglan alang [sa atong] kaugalingon nga paglambo. (Bruce C. Hafen ug Marie K. Hafen, *Faith Is Not Blind* [2018], 81, 88)



Usa ka gamhanan ug may impluwensiya nga modernong gidawat sa katilingban nga panghunahuna mao ang “moral nga pagkalahi-lahi,” ang ideya nga walay hingpit nga husto o sayop. Luyo sa mao nga ideya mao ang pagpakaingon nga walay Dios o, kon duna may Dios, nga siya wala mohatag og mga sugo nga magamit nato karon. . . .

Ang mga Santos sa Ulahing mga Adlaw dayag nga nagsugod sa lahi nga kapasikaran: adunay Dios kinsa mao ang tinubdan sa Mahangtoron nga Balaod, ug Siya mihatag og mga sugo nga nag-establisar sa husto ug sayop alang sa daghang pagpili. . . . Kita nagsupak sa moral nga pagkalahi-lahi, ug kinahanglan nato tabangan ang atong kabatan-onan nga makalikay nga malingla ug madani sa pagpangatarongan ug mga paghukom base sa sayop nga mga kapasikaran niini.

Asa kita mangita sa mga kapasikaran diin kita magsugod sa atong pagpangatarongan sa kamatuoran o sa pagtino kon madawat ba ang nagkalainlaing sugyot? Atong iangkla ang atong kaugalingon sa pulong sa Dios, sama nga nalangkob diha sa mga kasulatan ug diha sa mga pagtulon-an sa mga propeta sa modernong panahon. Gawas kon kita nakaangla niini nga mga kamatuoran isip ang atong importante nga mga kapasikaran ug mga pagpakaingon, dili kita makaseguro nga ang atong mga paghukom tinuod. (Dallin H. Oaks, “As He Thinketh in His Heart” [gabii uban sa usa ka General Authority, Peb. 8, 2013])

(*Pahibalo*: Ang usa ka *kapasikaran* mao ang sinugdanan o basehan alang sa inyong panglantaw. Ang usa ka *pagpakaingon* mao ang usa ka butang nga imong gipakaingon nga tinuod apan mahimong dili tinuod.)

Hisgoti ang mosunod nga mga pangutana:

- Ngano man nga atong mga kapasikaran (mga sinugdanan) mohimo og dako kaayo nga kalainan kon sa unsang paagi kita motubag og mga pangutana?
- Unsay kalainan nga mahimo kon kita mopresentar og pangutana nga inubanan sa pagtuo sa Dios isip atong nagpaluyo nga kapasikaran?
- Ngano man nga importante nga makasabot nga ang pagtuo sa Dios usa ka pagpili?

Base sa unsay inyong nakat-onan atol niini nga panaghisgotan, irekord ang usa ka giusab nga bersiyon sa pamahayag 3. Pangandam sa pagpakigbahin sa inyong giusab nga pamahayag ug sa unsay inyong nakat-onan ngadto sa inyong klase.